



# Lebih 90,000 benih ikan dilepas demi kelangsungan hidup Orang Asli di Tasik Chini

Oleh **Mohd Rafi Mamat** - September 12, 2022 @ 8:24am  
[bhnews@bh.com.my](mailto:bhnews@bh.com.my)



Menteri Besar Pahang, Datuk Seri Wan Rosdy Wan Ismail (topi biru) dan Menteri Tenaga dan Sumber Asli, Datuk Seri Takiyuddin Hassan (dua kiri) pada Program Pelepasan 21,000 Benih Ikan Air Tawar di Tasik Chini. - Foto MOHD RAFI MAMAT

PEKAN: Jabatan Perikanan Pahang melepaskan lebih 96,500 benih ikan ke Tasik Chini, di sini secara berperingkat sejak tahun lalu, membabitkan empat spesies ikan air tawar iaitu lampam sungai, baung, sebarau dan terbol.

Pengarah Perikanan Pahang, Abdullah Jaafar berkata sumber utama benih ikan dikeluarkan Pusat Pengembangan Akuakultur (PPA) Perlok, Jerantut dan PPA Bukit Tinggi, Bentong.

Katanya, pelepasan benih ikan di Tasik Chini bertujuan untuk menambah stok ikan di perairan berkenaan seterusnya memberi manfaat khususnya kepada nelayan darat terutama komuniti Orang Asli.

Beliau berkata, penduduk setempat melakukan aktiviti memancing sebagai sumber makanan keluarga selain untuk dijual bagi menambah pendapatan.

"Jabatan sentiasa memberi perhatian terhadap usaha menambah stok ikan diperairan umum negeri ini, selain tasik aktiviti pelepasan benih ikan turut dilakukan di beberapa sungai utama dan empangan di Pahang.

"Turut dilepaskan benih udang galah dan antara lokasi pelepasan di Sungai Rompin dan Sungai Pontian di Rompin termasuk Sungai Kuantan serta Sungai Bukit Rengin di Kuantan," katanya pada Program Pelepasan 21,000 Benih Ikan Air Tawar di Tasik Chini sempena Program Penanaman Pokok dan Pengayaan Tasik Chini, di sini.

Program berkenaan dirasmikan Menteri Besar, Datuk Seri Wan Rosdy Wan Ismail.

Turut sama Menteri Tenaga dan Sumber Asli, Datuk Seri Takiyuddin Hassan dan Ketua Setiausaha Kementerian Tenaga dan Sumber Asli, Datuk Rosli Isa.

Abdullah menambah, aktiviti memancing diharap menjadi produk tambahan kepada sektor pelancongan di Tasik Chini yang sudah lama terkenal sebagai destinasi kunjungan pelancong dalam dan luar negara untuk melihat keindahan tasik semula jadi.

"Saya difahamkan setiap hari komuniti Orang Asli yang menetap berhampiran Tasik Chini menangkap ikan menggunakan pancing, mereka menggunakan perahu untuk sampai ke tempat berkenaan.

"Jabatan akan terus berusaha menambah stok ikan di Tasik Chini menerusi program pelepasan benih ikan spesies utama seperti lampam sungai, baung, sebarau dan terbol secara berterusan setiap tahun," katanya yang berharap aktiviti pengawalan kegiatan dilarang mendapat kerjasama komuniti setempat.